

四庫全書

集部

欽定四庫全書

御定全唐詩錄卷四十四

竇叔向

叔向字遺直扶風人代宗時人與常袞善袞為相  
用為左拾遺內供奉及貶出為溧水令贈為工部  
尚書諸子常牟羣庠輩皆有詩名號五竇

近體詩

春日早朝應制

金上八ノ二  
卷四十四  
紫殿俯千官春松應合歡御爐香焰煖馳道玉聲寒乳  
燕翻珠綴祥鳥集露盤宮花一萬樹不敢舉頭看

過擔石湖

曉發漁門戍晴看擔石湖日銜高浪出天入四空無咫尺分洲島纖毫指舳艫渺然從此去誰念客帆孤

秋砧送包大夫

斷續長門夜清冷逆旅秋征夫應待信寒女不勝愁帶月飛城上因風散陌頭離居偏入聽况復送歸舟

貞懿皇后挽歌

後庭攀畫柳上陌咽清笳命婦羞蘋葉都人挿柰花壽

宮星月異仙路往來賒縱有迎神術終悲隔絳紗

晉史云成

帝時三吳女子相與簪白花望之如素柰傳言天公織女死為之著服已而杜皇后崩其言遂驗

夏夜宿表兄話舊

夜合花開香滿庭夜深微雨醉初醒  
遠書珍重何曾達舊事淒涼不可聽  
去日兒童皆長大昔年親友半凋零  
明朝又是孤舟別愁見河橋酒幔青

酬李袁州嘉祐

少年輕會復輕離，老大關心總是非。  
強說前程聊自慰，未知攜手定何時。  
公才屈指登黃閣，匪服胡顏上赤墀。

想到長安誦佳句，滿朝誰不念瓊枝。

嘉祐以詩送叔向并寄其弟紆云自

歎未霑黃紙詔，那堪遠送赤墀人。老為僞客偏相戀，素是詩家倍益親。妻兒共載無羈思，鴛鴦同行不負身。憑爾將書通令弟，惟論華髮愧頭巾。故叔向詩有瓊枝之句。

竇常

常字中行，叔向長子。大歷中，王儲榜登第，累官水

部員外郎後遷國子祭酒父叔向有詩名五子皆  
工詞章為聯珠集五卷時取昆季若五星焉

近體詩

北固晚眺

水國芒種後梅天風雨涼露蠶開晚簇

擇圓至云露蠶  
謂露養於外自

淮以西其俗皆然每至晚晴連  
屋開箔望之如雪簇蠶箔也

江燕繞危檣山趾北來

固潮頭西去長年年此登眺人事幾銷亡

晚次方山精舍卻寄張薦員外

楚臘還無雪江春又足風馬羸三徑外人病四愁中西  
塞波濤潤南朝寺舍空猶銜步兵酒宿醉在滁東

途中立春寄懷楊郇伯

浪跡終年客驚心此地春風前獨去馬澤畔耦耕人老  
大交情重悲涼物外親子雲今在宅應見柳條新

早春金鈎店寄奚十唐大二茂才

出門山未曙風葉暗蕭蕭月影臨荒柵泉聲近廢橋歲  
經秋後役程在洛中遙寄謝金門侶弓旌悞見招

之任武陵寒食日途次松滋渡先寄劉員外禹錫

杏花榆莢曉風前雲際離離上峽船江轉數程淹驛騎  
楚曾三戶少人烟看春又過清明節算老重經癸巳年

幸得桂山當郡舍在朝長詠卜居篇

桂山在武陵郡東十七里今德山縣

過宋氏五女舊居

宋氏女姊妹五人貞元中同入宮

謝庭風韻婕妤才天縱斯文去不回一宅柳花今似雪

鄉人擬築望仙臺

寶年



牟字貽周貞元二年進士累佐節度府穆宗長慶  
中為國子司業叔向次子

近體詩

望終南

日愛南山好時逢夏景殘白雲兼似雪清晝乍生寒九  
陌峰如墜千門翠可圍欲知形勝盡都在紫宸看

元日喜聞大禮寄上翰林四學士中書六舍人二

十韻

有事郊壇畢無私日月臨歲華春更早天瑞雪猶深玉  
輦迴時令金門降德音翰飛鴛別侶藜植桂為林粉澤  
資鴻筆薰和本素琴禮成戎器下恩徹鬼方沈麟爵來  
稱紀官師退絕箴道風黃閣靜祥景紫垣陰壽酒朝時  
獻農書夜直尋國香煖翠幄庭燎艷紅衾漢魏文章盛  
堯湯雨露湛密辭投水石精義出砂金宸扆親惟敬鈞  
衡近匪侵疾驅千里駿清唳九霄禽慶賜迎新服齋莊  
棄舊簪忽思班女怨遙聽越人吟末路甘貧病流年苦

滯淫夢中青瑣闥歸去碧山岑竊拊聞韶渡觀光想  
任大哉環海晏不竿子牟心

洛下閒居夜晴觀雪寄四遠諸兄弟

雪月相輝雲四開終風助凍不揚埃萬重瓊樹宮中接  
一直銀河天上來荆楚歲時知染翰湘湖醇酎憶銜杯  
強題縑素無顏色紅鴈南飛早晚回

秋夕閒居對雨贈別盧七侍御坦

燕燕辭巢蟬蛻枝窮居積雨壞藩籬夜長簷溜寒無寢

日晏厨煙濕未炊悟主一言那可學從軍五首竟徒為  
故人驄馬朝天使洛下秋聲恐要知

奉誠園聞笛

曾絕朱纓吐錦茵欲披荒草訪遺塵秋風忽灑西園淚

滿目山陽笛裏人

唐史馬燧之子暢以第中大杏餉竇文場文場以進德宗德宗未嘗見怪

之令中使封杏樹暢懼進宅為奉誠園雍錄云在安邑坊西暢自父死後屢為豪家邀取財產末年妻子凍餒無室無居德宗播越非馬燧幾亡不能恤其孤又奪其財業使之失所此故吏之所以傷也

竇羣

羣字丹列叔向第三子初以處士隱毗陵韋夏卿  
薦之朝德宗擢為左拾遺代武元衡為中丞薦呂  
溫羊士諤為御史李吉甫以二人躁險持不下羣  
怨吉甫伺吉甫陰事幾為憲宗所誅

古體詩

晨過昌師院

深庭芳草濃曉井山泉溢林馥亂沈烟石潤侵徑室幽  
巖鳥飛靜晴嶺雲歸密壁蘚凝蒼華竹陰滿晴日生期

半宵夢憂緒仍非一若無高世心安能此終畢

近體詩

初入諫司喜家室至

一旦悲歡見孟光十年辛苦伴滄浪不知筆硯緣封事  
猶問傭書日幾行

竇庠

庠字胄卿叔向第四子舉進士韓臯出鎮武昌辟  
為幕府陟大理司直權岳州刺史

古體詩

金山行

潤州金山寺  
寺在江心

西江中濡波四截涌出一峰青帶埭外如削成中決裂  
陽氣發生陰氣結是時炎天五六月上有火雲下冰雪  
夜色晨光相蕩沃積翠流霞滿坑谷龍泓徹底沙布金  
鳥道插雲梯甃玉架險凌虛隨指顧椽桷玲瓏皆固護  
幹流倒景不可窺萬仞千崖生跬步日華曛曛上金榜  
丹楹碧砌真珠網此時天海風浪清吳楚萬家皆在掌

瓊樓茵閣紛明媚曲檻回軒深且邃海鳥夜上珊瑚枝  
江花曉落琉璃地有時倒影沈江底萬狀分明光似洗  
不知水上有樓臺却就波中看閉啟舟人忘却江水深  
水神誤到人間世歛然風生波出沒灑灑晶瑩無定物  
居人相顧非人間如到日宮經月窟信知靈境長有靈  
住者不得無仙骨三神山上蓬萊宮徒有丹青人未逢  
何如此處靈山宅清涼不與囂塵隔曾到金山處處行  
夢魂長羨金山客



近體詩

訓韓愈侍郎登岳陽樓見贈

時子權知岳州事

巨浸連空濶危樓在杳冥稍分巴子國欲近老人星昏  
旦呈新候川原按舊經地圖封七澤天限鎖重扃萬象  
皆歸掌三光豈遁形月車纔碾浪日御已翻溟落照金  
成柱餘霞翠擁屏夜光疑漢曲寒韻辨湘靈山曉雲常  
碧湖春草遍青軒黃曾舉樂范蠡幾揚舲有客初留鷁  
貪程尚數莫自當徐孺榻不是謝公亭雅論冰生水雄

材刃發劓座中瓊玉潤名下菖蘭馨假守誠知拙齋心  
匪暫寧每慙公府粟却憶故山苓苦調當三嘆知音願  
一聽自悲由也瑟敢墜孔悝銘野杏初成雪松醪正滿  
瓶莫辭今日醉長恨古人醒

陪留守韓僕射巡內至上陽宮感興

愁烟漠漠草離離太液鈎陳處處疑薄暮毀垣春雨裏  
殘花猶發萬年枝

竇鞏

鞏字友封叔向第五子雅淡與人言若不出口世  
號躡嚙翁元稹為武昌軍節度辟為秘書少監兼  
御史中丞充節度副使

近體詩

老將吟

烽烟猶未盡年鬢暗相催  
輕敵心空在彎弓手不開  
馬依秋草病柳傍故營  
摧惟有酬恩客時聽說劍來

早秋江行

回望溢城遠西風吹荻花暮潮江勢濶秋雨雁行斜多  
醉渾無夢頻愁欲到家漸驚雲樹轉數點是晨鴉

題任處士幽居

紅葉江村夕孤烟草舍貧水清魚識釣林靜犬隨人採  
掇山無主扶持藥有神客來惟勸酒蝴蝶是前身

贈蕭都官

蕭郎自小賢愛客不言錢有酒輕寒夜無愁倚少年閒  
尋織錦字醉上看花船好是關身事從人道性偏

江陵遇元九李六二侍御紀事書情呈十二韻

自見人相愛如君愛我稀  
好閒容問道攻短每言非  
夢想何曾間追歡未省違  
看花憐後到避酒許先歸  
柳寺春隄遠津橋曙月微  
漁翁隨去處禪客共因依  
蓬閣初疑義霜臺晚畏威  
學深通古字心直觸危機  
肯滯荊州掾猶香柏署  
衣山連巫峽秀田傍渚宮肥  
美玉方齊價遷鶯尚怯飛  
佇看霄漢上連步侍彤闈

南陽道中作

東風雨洗順陽川，蜀錦花開綠草田。  
彩雉鬪時頻駐馬，酒旗翻處亦留錢。  
新晴日照山頭雪，薄暮人爭渡口船。  
早晚到家春欲盡，今年寒食月初圓。

哭呂衡州八郎中

今朝血淚問蒼蒼，不分先悲旅館喪。  
人送劍來歸壠上，雁飛書去叫衡陽。  
還家路遠兒童小，埋玉泉深晝夜長。  
望盡素車秋草外，欲將身贖返魂香。

自京將赴黔南

風雨荊州二月天  
問人初僱峽中船  
西南一望雲和水  
猶道黔南有四千

南遊感興

傷心欲問前朝事  
惟見江流去不回  
日暮東風春草綠  
鷓鴣飛上越王臺

宮人斜

離宮路遶北原斜  
生死恩深不到家  
雲雨今歸何處去  
黃鸝飛上野棠花

代鄰叟

年來七十罷耕桑就暖支羸強下牀  
滿眼兒孫身外事閒梳白髮對殘陽

襄陽寒食寄宇文籍

烟水初消見萬家東風吹柳萬條斜  
大隄欲上誰相伴馬踏春泥半是花

寄南遊弟兄

書來未報幾時還知在三湘五嶺間  
獨立衡門秋水濶



寒鴉飛去日銜山

放魚

武昌作

金錢贖得免刀痕聞道禽魚亦感恩好去長江千萬里  
不須辛苦上龍門

悼妓東東

芳菲美艷不禁風未到春殘已墜紅惟有側輪車上鐸  
耳邊長似叫東東

暢當

當河東人初以子弟被召從軍後登大曆七年進士第貞元初為太常博士終果州刺史與弟諸皆  
有詩名據盧綸還往詩嘗辟山南幕又為叅軍  
計敏夫云當詩平淡多佳句如水定鶴翻去松欹  
峰儼如暉暉耿不暮平江寂無聲湖畔聞漁唱天  
邊數雁行陽崖全帶日寬嶂偶通耕皆有遠意

近體詩

軍中醉歌寄沈八劉叟

酒渴愛江清，餘酣漱晚汀。  
軟莎歌坐穩，冷石醉眠醒。  
野膳隨行帳，華音發從伶。  
數杯君不見，都已遣沈冥。

山居奉酬韋蘇州見寄

孤茅泄烟處，此中山叟居。  
親雲寧有事，耽酒詎知餘。  
水定鶴翻去，松歌峰儼如。  
猶煩使君問，更欲結環廬。

天柱隱所重答韋江州

寂寞一帳望，秋風山景清。  
此中惟草色，翻意見人行。  
荒徑饒松子，深蘿絕鳥聲。  
陽崖全帶日，寬嶂偶通耕。  
拙昧

難容世貧窮別有情煩君瓊玖贈幽懶百無成

登鸛鵲樓

迴臨飛鳥上高出世塵間天勢圍平野河流入斷山

暢諸

諸暢當之弟

近體詩

早春

獻歲春猶淺園林未盡開雪和新雨落風帶舊寒來聽

鳥聞歸雁看花識早梅生涯知幾日更被一年催

朱灣

灣字巨川西蜀人自號滄州子貞元元和間為李  
勉永平從事

灣嘗干湖州崔使君侃不遇獻書云灣自假道路  
問津主人一身孤雲兩度圓月凡再請職事三趨  
戟門信知庭之與堂不啻千里寄食漂母夜眠漁  
舟龍門轉深玉粟轉貴屬谿上風便囊中金貧望

甘棠而歎自引分而退也

高仲武云朱灣率履貞素放情江湖郡國交辟潛  
耀不起有唐高人也詩體幽遠興用宏深因詞寫  
意窮理盡性於詠物尤工如受氣何曾異開花獨  
自遲所謂哀而不傷國風之深者也

古體詩

寒城晚角

高臺高高畫角雄五更初發寒城中寒城北臨大河水

淇門賊烽隔岸是

闕

風送過黎陽川我軍氣雄賊心死

羈人此夜寐不成萬里邊情枕上生乍似隴頭戍寒泉  
幽咽流不住又如巴江頭啼猿帶雨斷續愁忽憶嫖姚  
北征伐空山宿兵寒對月一聲老將去三奏行人發冀  
馬為之嘶朔雲為之結二十年來天下兵到處不曾無  
此聲洛陽陌長安路角聲朝朝兼暮暮平居聞之尚難  
度何況天山征戍兒雲中下營雪裏吹

壁畫古松

石上盤古根謂言天生朽安知草木性變在畫師手陰  
深方丈間真趣幽且閒木文離披勢搓粹中裂空心火  
燒出掃成三寸五寸枝便作千年萬年物莓苔濃淡意  
不同一半死皮藏蠹蟲風霜未必來到此氣色杳似寒  
山中孤標可玩不可取能使支公道場古

近體詩

賦得白鳥翔翠微送陳偃下第歸

不知鷗與鶴天畔弄晴暉背日分明見臨川相映微淨



中雲一點迴處雪孤飛正好高枝立翩翩何所歸

九日登青山

昔人惆悵地繫馬又登臨舊處烟霞在多時草木深水  
將空合色雲共我無心想見龍山會良辰亦似今

秋夜宴王郎中宅賦得露中菊

衆芳春競發寒菊露偏滋受氣何曾異開花獨自遲晚  
成猶有分欲採未過時忍棄東籬下看隨秋草衰

逼寒節寄崔七

閒庭只是長莓苔  
三徑曾無車馬來  
旅館尚愁寒食火  
羈心懶向不燃灰  
門前下客雖彈鋏  
溪畔窮魚且曝腮  
他日趨庭應問禮  
須言陋巷有顏回

尋隱者韋九於東溪草堂

尋得仙源訪隱淪  
漸來深處漸無塵  
初行竹裏惟通馬  
直到花間始見人  
四面雲山誰作主  
數家烟火自為隣  
路傍樵客何須問  
朝市如今不是秦

過宣上人湖上蘭若

十年湖上結幽期，偏向東林遇遠師。  
未道姓名童子識，不酬言語上人知。  
閒花落地滋苔徑，細雨和烟著柳枝。  
問我別來何所得，解將無事當無為。

于鵠

鵠大歷貞元間詩人也。隱居漢陽，嘗為諸府從事。  
徐獻忠云：鵠習隱多高人之意，故其詩能有景象。  
山中訪道諸大篇，遂與松檜同幽，雲霞混迹，不疑  
世外人作也。

古體詩

過凌霄洞天謁張先生祠

戢戢亂峰裏一峰獨凌天下看如尖高上有十里泉至  
人愛幽深一住五十年懸犢到其上乘春耕藥田衣食  
不下求乃是雲中仙山僧獨知處相引衝碧烟斷崖晝  
昏黑槎枿橫雙椽面壁攀石稜養力方敢前累歇日已  
沒始到茅堂邊見客不問誰禮質無周旋醉卧枕欹樹  
寒坐展青氈折松掃藜牀秋菓顏色鮮白犬舐客衣驚

走聞腥羶乃知軒冕徒寧比雲壑眠

入白芝溪尋黃尊師

觸煙入溪口岸岸唯檉櫟其中盡碧流十里不通屐出  
林山始轉絕徑緣峭壁把藤借行勢側足憑石脈頗牙  
斷行處光滑猿猴跡忽然風景異乃到神仙宅天晴茆  
屋頭殘雪蒸氣白隔窓梳髮聲久立聞吹幘抱琴出門  
來不顧人間客山院不灑掃四時自虛寂落葉埋長松  
出地纔數尺曾讀上清經知注長生籍願示不死方何

山有瓊液

寄盧儼員外秋衣詞

寄遠空以心心誠亦難知篋中有秋帛裁作遠客衣縫  
製雖女工尺度手自持容貌常目中長短不復疑斜縫  
密且堅遊客多塵緇意欲都無言澣濯耐歲時殷勤託  
行人傳語慎勿遺別來年已老亦聞鬢成絲縱然更相  
逢握手惟是悲所寄莫復棄願見長相思

近體詩

山中自述

三十無名客空山獨卧秋病多  
知樂性年長信人愁螢  
影竹窓下松聲茅屋頭  
近來心更靜不夢世間遊

春山居

獨來多任性惟與白雲期  
深處花開盡遲眠人不知  
水流山暗處風起月明時  
望見南峰近年年懶更移

尋李逸人舊居

舊隱松林下衝泉入兩涯  
琴書隨弟子雞犬在隣家  
茅

屋長黃菌槿籬生白花幽墳無處訪恐是入烟霞

尋李暹

任性常多出人來得見稀市樓逢酒住野寺送僧歸  
簷下懸秋葉籬頭曬褐衣門前南北路誰肯入柴扉

題隣居

僻巷隣家少茅簷喜並居蒸梨常共竈澆薤亦同渠  
傳展朝尋藥分燈夜讀書雖然在城市還得似樵漁

山中寄韋鉦



懶成身病日因醉卧多時送客出谿少讀書終卷遲幽  
窓聞墜葉晴景見遊絲早晚來收藥門前有紫芝

送韋判官歸薊門

桑乾歸路遠聞說亦愁人有雪常經夏無花空到春下  
營雲外火收馬月中塵白首從戎客青衫未離身

山中寄樊尚書

却憶東溪日同袍是魯儒僧房閒共宿酒肆醉相扶江  
上雙旌貴山中病客孤無媒還有計春谷種桑榆

送客遊塞

若到并州北誰人不憶家  
塞深無去伴路盡有平沙  
磧冷惟逢鴈天春不見花  
莫隨邊將意垂老事輕車

公子行

少年初拜大長秋半醉垂鞭見列侯  
馬上抱雞三市鬪袖中攜劍五陵遊  
玉簫金管迎歸院錦袖紅粧擁上樓  
更向苑西新買宅月陂春水入門流

送宮人入道

十五吹簫入漢宮看修水殿種芙蓉自傷白髮辭金屋  
許著黃冠向雪峰解語老猿開曉戶學飛雛鶴落高松  
定知別後宮中伴遙聽緱山半夜鐘

江南曲

偶向江邊採白蘋還隨女伴賽江神衆中不敢分明語  
暗擲金錢卜遠人

巴女謠

巴女騎牛唱竹枝藕絲菱葉傍江時不愁日暮還家錯

記得芭蕉出槿籬

襄陽席上

老大看花長不足  
沿江尋得一枝紅  
黃昏人散東風起  
吹落誰家明月中

題美人

秦女窺人不解羞  
攀花趁蝶出牆頭  
胸前空帶宜春草  
嫁得蕭郎愛遠游

朱放

放字長通襄州人隱於越之剡溪召為拾遺不就  
近體詩

山中聽子規

幽人自愛山中宿又近葛洪丹井西窓中有箇長松樹  
半夜子規來上啼

戴叔倫

叔倫字幼公潤州金壇人師事蕭穎士為門人冠  
劉晏掌鹽鐵表主管湖南歷撫州刺史容管經畧

使所至治行稱最德宗嘗賦中和節詩遣使者寵  
賜世以為榮

高仲武云叔倫為人溫雅善舉止無賢不肖見皆  
盡心詩體雖不中越格然解字經山火公田沒海  
潮亦指事造形之工者其骨氣稍輕故詩亦少

晁公武曰叔倫唐史不稱其能詩正以時人少其  
綿弱耳

### 古體詩

感懷

尺帛無長裁淺水無長流  
水淺易成枯帛短誰人收  
人生取舍間趨競固非優  
舊交跡雖疎中心自云稠  
新交意雖密中道生怨尤  
踟蹰復踟蹰世路今悠悠

南野

治田長山下引流坦溪曲  
東山有遺塋南野起新築  
家世素業儒子孫鄙食祿  
披雲朝出畊帶月夜歸讀  
身勤竟忘疲團團欣在目  
野芳綠可採泉美清可掬  
茂樹延

晚涼早田候秋熟茶烹松火紅酒吸荷杯綠解佩臨清  
池撫粟看修竹此懷誰與同此樂吾所獨

女耕田行

乳燕入巢筭成竹誰家二女種新穀無人無牛不及犁  
持刀斫地翻作泥自言家貧母年老長兄從軍未娶嫂  
去年灾疫牛困空截絹買刀都市中頭巾掩面畏人識  
以刀代牛誰與同姊妹相攜心正苦不見路人唯見土  
疏通畦壟防亂苗整頓溝塍待時雨日正南岡下餉歸



可憐朝雉擾驚飛，東隣西舍花發盡，共惜餘芳淚滿衣。

白苧詞

館娃宮中露華冷，月落啼鴉散金井。吳王扶頭酒初醒，  
秉燭張筵樂清景。美人不眠憐夜永，起舞亭亭亂花影。  
新裁白苧勝紅綃，玉佩珠纓金步搖。回鸞轉鳳意自嬌，  
銀箏錦瑟聲相調。君恩如水流不斷，但願年年同此宵。  
東風吹花落庭樹，春色催人等閒去。大家為歡莫延佇，  
頃刻銅龍報天曙。

邊城曲

人生莫作遠行客，遠行莫戍黃沙磧。  
黃沙磧下八月時，霜風裂膚百草衰。  
塵沙晴天迷道路，河水悠悠向東去。  
胡笳聽徹雙淚流，羈魂慘慘生邊愁。  
原頭獵火夜相向，馬蹄蹴蹋層冰上。  
不似京華俠少年，清歌妙舞落花前。

屯田詞

春來耕田遍沙磧，老稚欣欣種禾麥。  
麥苗漸長天苦晴，土乾确确鋤不得。  
新禾未熟飛蝗生，青苗食盡餘枯莖。

捕蝗歸來守空屋囊無寸帛餅無粟十月移屯來向城  
官教去伐南山木驅牛駕車入山去霜重草枯牛凍死  
艱辛歷盡誰得知望斷天南淚如雨

早春曲

青樓昨夜東風轉錦帳凝寒覺春淺垂楊搖絲鶯亂啼  
裊裊烟光不堪剪博山吹雲龍腦香銅壺滴愁更漏長  
玉頰啼紅夢初醒羞見青鸞鏡中影儂家少年愛遊逸  
萬里輪蹄去無跡朱顏未衰消息稀腸斷天涯草空碧

相思曲

高樓重重閉明月腸斷先年隔山別紫簫橫笛寂無聲  
獨向瑤窓坐愁絕魚沈雁杳天涯路始信人間別離苦  
恨滿牙床翡翠衾怨折金釵鳳股井深轆轤嗟綆短  
衣帶相思日應緩將刀砍水水復連揮刃割情情不斷  
落紅亂逐東流水一點芳心為君死妾身願作巫山雲  
飛入仙郎夢魂裏

懷素上人草書歌

楚僧懷素工草書古法盡能新有餘神清骨疎意真率  
醉來為我揮健筆始從破體變風姿一一花開春景遲  
忽為壯麗就枯澁龍蛇騰盤獸屹立馳毫聚墨劇奔灑  
滿座失聲看不及心手相師勢轉竒詭形怪狀翻合宜  
人人細問此中妙懷素自言初不知

近體詩

除夜宿石頭驛

旅館誰相問寒燈獨可親  
一年將盡夜萬里未歸人  
寥

落悲前事支離笑此身愁顏與衰鬢明日又逢春

汝南逢董校書

擾擾倦行役相逢陳蔡間如何百年內不見一人閒對  
酒惜餘景問程愁亂山秋風萬里道又度穆陵關

早行寄朱放

山曉旅人去天高秋氣悲明河川上沒芳草露中衰此  
別又千里少年能幾時心知剡溪路聊且寄前期

潘處士宅會別

相邀寒影晚，惜別故山空。  
鄰里疎林在，池塘野水通。  
十年多難後，一醉幾人同。  
復此悲行子，蕭蕭逐遠蓬。

灞岸別友

車馬去遲遲，離言未盡時。  
看花一醉別，會面幾年期。  
樵路商山館，漁洲楚帝祠。  
南登回首處，猶得望京師。

送謝夷甫宰鄆縣

君去方為縣，干戈尚未銷。  
邑中殘老小，亂後少官僚。  
解宇經山火，公田沒海潮。  
到時應變俗，新政滿餘姚。

山居即事

巖雲掩竹扉去鳥帶餘暉地僻生涯薄山深俗事稀  
養花分宿雨剪葉補秋衣野渡逢漁子同舟蕩月歸

卧病

門掩青山卧莓苔積雨深病多知藥性客久見人心  
衆鳥趨林健孤蟬抱葉吟滄洲詩社散無夢盍朋簪

晚望

山氣碧氤氳深林帶夕曛人歸孤嶂晚犬吠隔溪雲  
杉



竹何年種烟塵此地分桃源寧異此猶恐世間聞

山行

山行分曙色一路見人稀  
野鳥啼還歇林花墮不飛  
雲迷棲鶴寺水溢釣魚磯  
回首天將暝逢僧話未歸

泛舟

風軟扁舟穩行依綠水堤孤樽  
秋露滑短棹晚烟迷  
夜靜月初上江空天更低  
飄飄信流去悞過子猷溪

客中言懷

白髮照烏紗逢人只自嗟官閒如致仕客久似無家夜  
雨孤燈夢春風幾度花故園歸有日詩酒老生涯

江干

江干望不極樓閣影繽紛水氣多為雨人烟遠是雲予  
生何獲落客路轉辛勤楊柳牽愁思和春上翠裙

春日訪山人

遠訪山中客分泉漫煮茶相攜林下坐共惜鬢邊華歸  
路逢殘雨沿溪見落花候門童子問遊樂到誰家

江上別張歡

年年五湖上，厭見五湖春。  
長醉非關酒，多愁不為貧。  
山川迷道路，伊洛暗風塵。  
今日扁舟別，俱為滄海人。

客舍與故人偶集

天秋月又滿，城闕夜千重。  
還作江南會，翻疑夢裏逢。  
風枝驚暗鵲，露草覆寒蛩。  
羈旅長堪醉，相留畏曉鐘。

送友人東歸

萬里楊柳色，出關逢故人。  
輕烟拂流水，落日照行塵。  
積

夢江湖濶憶家兄弟貧徘徊灞亭上不語自傷春

和汴州李相公勉人日喜春

年來日日春光好今日春光好更新獨獻菜羹憐應節  
遍傳金勝喜逢人烟添柳色看猶淺烏踏梅花落已頻  
東閣此時聞一曲翻令和者不勝春

宮詞

紫禁迢迢宮漏鳴夜深無語獨含情春風鸞鏡愁中影  
明月羊車夢裏聲塵暗玉階綦跡斷香飄金屋篆烟清

貞心一任蛾眉妬買賦何須問馬卿

過賈誼舊居

楚鄉卑濕歎殊方鵬賦人非宅已荒漫有長書憂漢室  
空將哀些弔沅湘雨餘古井生秋草葉盡疎林見夕陽  
過客不須頻太息咸陽宮殿亦淒涼

閨怨

看花無語淚如傾多少春風怨別情不識玉門關外路  
夢中昨夜到邊城

題友人山居

四郭青山處處同  
客懷無計答秋風  
數家茅屋清溪上  
千樹蟬聲落日中

夜發烏江作

半夜回舟入楚鄉  
月明山色共蒼蒼  
孤猿更叫秋風裏  
不是愁人也斷腸

湘南即事

盧橘花開楓葉衰  
出門何處望京師  
沅湘日夜東流去

不為愁人住少時

釋圓至云身不得去故怨水之去所以深傷已不能去蓋叔倫事曹王於

湖湘故有是作秦少游謫郴州有詞云彬江幸自遶彬山為誰流下瀟湘去正用此意

### 蘇溪亭

蘇溪亭上草漫漫誰倚東風十二闌  
燕子不歸春事晚  
一汀晚雨杏花寒

### 別張員外

木葉紛紛湘水濱此中何事往頻頻  
臨風自笑歸時晚  
更送浮雲逐故人

送呂少府

共醉流芳獨歸去故園高士日相親  
深山古路無楊柳折取桐花寄遠人





御定全唐詩錄卷四十四

欽定四庫全書

集部

御定全唐詩錄卷四十五

詳校官左中允<sub>臣</sub> 璿五珠

主事銜<sub>臣</sub> 徐以坤覆勘

總校官原任中允<sub>臣</sub> 王燕緒

校對官中書<sub>臣</sub> 嵇承志

謄錄監生<sub>臣</sub> 胡宗高

謄錄監生<sub>臣</sub> 宋 曷

欽定四庫全書

御定全唐詩錄卷四十五

李益

益字君虞姑臧人肅宗朝宰相揆之族子登進士  
第長於歌詩貞元末與宗人李賀齊名每作一篇  
為教坊樂人以賂求取唱為供奉歌辭其征人歌  
早行等篇好事者畫為屏障迴樂峰前沙似雪受  
降城外月如霜之句天下以為歌辭然少有癡病

而多猜忌防閑妻妾過為苛酷而有散灰扃戶之譚聞於時故時謂妒癡為李益疾以是久之不調而流輩皆居顯位益不得意北遊河朔幽州劉濟辟為從事常與濟詩而有不上望京樓之句憲宗雅聞其名自河北召還用為秘書少監集賢殿學士自負才地多所凌忽為眾不容諫官因暴其在濟幕詩有怨望語降居散秩俄復用為秘書監遷太子賓客集賢學士判院事轉右散騎常侍太和

初以禮部尚書致仕

益從軍詩自序曰君虞長始八歲燕戎作亂出身年二十三受末秩從事十八載五在兵間故其為文咸多軍旅之思自建中初故府司空巡行朔野迨貞元初又忝今尚書之命從此出上郡五原四五年荏苒從役其中雖流落南北亦多在軍戎凡所作邊塞諸文皆書奏餘事同時幕府選辟多出詞人或因軍中酒酣或時塞上兵寢相與投劍秉

筆散懷於斯文率皆出於慷慨意氣武毅獷厲本  
其涼國則世將之後乃西州之遺民歟亦其坎壈  
當世發之所致也時左補闕盧景亮見知於文者  
令予輯錄遂成五十首贈之今綴各體後

古體詩

游子吟

女羞夫壻薄客恥主人賤遭遇同衆流低徊愧相見君  
非青銅鏡何事空照面莫以衣上塵不謂心如練人生

當榮盛待士勿言倦君看白日馳何異弦上箭

雜曲

妾本蠶家女不識貴門儀  
藁砧持玉斧交結五陵兒  
十日或一見九日在路歧  
人生此夫壻富貴欲何為  
楊柳徒可折南山不可移  
婦人貴結髮寧有再嫁資  
嫁女莫望高女心願所宜  
寧從賤相守不願貴相離  
藍葉鬱重重藍花若榴色  
少女歸少年光華自相得  
誰言配君子以奉百年身  
有義即夫壻無義還他人  
愛如寒爐火棄

若秋風扇山嶽起面前相看不相見丈夫非小兒何用  
強相知不見朝生茵易成還易衰征客欲臨路居人還  
出門北風河梁上四野愁雲繁豈不戀我家夫壻多感  
恩前程有日月勲績在河源少婦馬前立請君聽一言  
春至草亦生誰能無別情殷勤展心素見新莫忘故遙  
望孟門山殷勤報君子既為隨陽雁勿學西流水嘗聞  
生別離悲莫悲於此同器不同榮堂下即千里與君貧  
賤交何異萍上水託身天使然同生復同死



罷秩後入華山採茯苓逢道者

委綬來名山觀竒恣所停山中若有聞言此不死庭遂  
逢五老人一謂西嶽靈或聞樵人語飛去入昴星授我  
出雲路蒼然凌石屏視之有文字乃古黃庭經左右長  
松列動搖風露零上蟠千年枝陰虬負青冥下結九秋  
霰流膏為茯苓取之砂石間異若龜鶴形况聞秦宮女  
華髮變已青有如上帝心與我千萬齡始疑有仙骨鍊  
魂可永寧何事逐豪遊飲啄以羶腥神物亦自悶風雷

護此局欲傳山中寶回策忽已暝乃悲世上人求醒終不醒

從軍有苦樂行

時從司空冀公北征作

勞者且莫歌我歌送君觴從君有苦樂此曲樂未央僕居在隴上隴水斷人腸東過秦宮路宮樹入咸陽時逢漢帝出諫獵至長楊詎馳遊俠窟非結少年場一旦承嘉惠輕身重恩光秉筆參帷帟從軍至朔方邊地多陰風草木自淒涼斷絕海雲去出沒胡沙長參差引雁翼

隱赫騰軍裝，劍文夜如水。馬汗凍成霜，俠氣五都少。矜  
功六郡良，山河起目前。睚眦死路傍，北逐驅種落，西臨  
復舊疆。昔還勘餘資，今出乃贏糧。一矢弋夏服，我弓不  
再張。寄語丈夫雄，苦樂身自當。

來從竇車騎

東髮逢世屯，懷恩抱明義。讀書良不武，學劍慙非智。遂  
別魯諸生，來從竇車騎。追兵起邊急，絡馬黃金轡。出入  
燕南陲，由來重意氣。自經臯蘭戰，入破樓煩地。西北護

三邊東南留一尉時過如雲雨參差不自意將軍失恩  
澤萬事從此異置酒高臺上薄暮秋風起長戟與我歸  
歸來同棄置自酌還自飲非名又非利歌出易水寒琴  
下雍門淚出逢平樂舊言在天階侍問我從軍苦自陳  
少年貴丈夫交四海徒論身自致漢將不封侯蘇卿還  
遠使今我終此曲此曲誠不易貴人難識心何由知忌

諱

效古促促曲為河上思婦作

促促何促促黃河九迴曲嫁與棹船郎空牀將影宿不  
道君心不如石那令妾貌長如玉

登夏州城觀送行人賦得六州胡兒歌

六州胡兒六蕃語十歲騎羊射沙鼠沙頭牧馬孤雁飛  
漢軍游騎貂錦衣雲中征戍三千里今日征行何歲歸  
無定河邊數株柳共送行人一杯酒胡兒起作六蕃歌  
齊唱嗚嗚盡垂手心知舊國西州遠西嚮胡天望鄉久  
回身忽作異方聲一聲回盡征人首蕃音塞曲自難分

似說邊情向朔雲故國關山無限路風沙滿眼堪斷魂  
不見天邊青草冢古來愁殺漢昭君

夜上西城聽梁州

行人夜上西城宿聽唱梁州雙管逐此時秋月滿關山  
何處關山無此曲鴻雁新從北地來聞聲一半却飛回  
金河戍客腸應斷更在秋風百尺臺

近體詩

獻劉濟

草綠古燕州鶯聲引獨游雁歸天北畔春盡海西頭向  
日花偏落馳年水自流感恩知有地不上望京樓

送同落第者東歸

東門有行客落日滿前山聖代誰知者滄洲今獨還片  
雲歸海暮流水背城閒余亦依嵩潁松花深閉關

登長城

郭茂倩作  
塞下曲

漢家今上郡秦塞古長城有日雲長慘無風沙自驚當  
今聖天子不戰四夷平

同崔頌登鶴雀樓

鶴雀樓西百尺檣汀洲雲樹共茫茫漢家蕭鼓空流水  
魏國山河半夕陽事去千年猶恨速愁來一日即為長  
風烟併起思歸望遠目非春亦自傷

過馬嵬

金甲銀旌盡已回蒼茫羅袖隔風埃濃香猶自隨鸞輅  
恨魄無由離馬嵬南內真人悲悵殿東溟方士問蓬萊  
惟留坡畔彎環月時送殘輝入夜臺



送賈校書東歸寄振上人

北風吹雁數聲悲，况指前林是別時。  
秋草不堪頻送遠，白雲何處更相期。  
山隨匹馬行看暮，路入寒城獨去遲。  
為問東州故人道，江淹已擬惠休書。

過五原至飲馬泉

綠楊著水草如烟，舊是胡兒飲馬泉。  
幾處吹笳明月夜，何人倚劍白雲天。  
從來凍合關山路，今日分流漢使前。  
莫遣行人照容鬢，恐驚憔悴入新年。

鷓鴣詞

湘江斑竹枝錦翅鷓鴣飛處處湘雲合郎從何處歸

聽唱赤白桃李花

赤白桃李花先皇在時曲欲向西宮唱西宮宮樹綠

代人乞花

繡戶朝眠起開簾滿地花春風解人意吹落妾西家

宮怨

露濕晴花春殿香月明歌吹在昭陽似將海水添宮漏

共滴長門一夜長

江南曲

一作韓  
翊詩

長落花枝雨點消  
江城日暮好相邀  
春樓不閉葳蕤鎖  
綠水回連宛轉橋

汴河曲

汴水東流無限春  
隋家宮苑已成塵  
行人莫上長堤望  
風起楊花愁殺人

寫情

水紋珍簟思悠悠千里佳期一日休從此無心愛良夜  
任他明月下西樓

九月十日雨中過張伯雄期柳雄未至

柳吳興近無消息張長公貧苦寂寥惟有角巾雷雨至  
手持殘菊向西招

上汝州郡樓

黃昏鼓角似邊州三十年前上此樓今日山川對垂淚  
傷心不獨為悲秋

宿石邑山中

浮雲不共此山齊  
山靄蒼蒼望轉迷  
曉月暫飛高樹裏  
秋河隔在數峰西

避暑女冠

霧袖煙裙雲母冠  
碧琉璃簾井水寒  
焚香欲降三青鳥  
靜拂桐陰上玉壇

春夜聞笛

寒山吹笛望春歸  
遷客相看淚滿衣  
洞庭一夜無窮雁

不待天明盡北飛

從軍北征

天山雪後海風寒  
橫笛偏吹行路難  
磧裏征人三十萬  
一時回首月中看

暖川

朔風凍合鷓鴣泉  
牧馬千羣逐暖川  
塞外征行無盡日  
年年移帳雪中天

度破訥沙

眼見風來沙旋移  
經年不省草生時  
莫言塞北無春到  
總有春來何處知

破訥沙頭雁正飛  
鷓鴣泉上戰初歸  
平明日出東南地  
滿磧寒光生鐵衣

臨滹沱見蕃使列名

漠南春色到滹沱  
邊柳青青塞馬多  
萬里江山今不閉  
漢家頻許郅支和

夜宴觀石將軍舞

微月東南上戍樓琵琶起舞錦纏頭更聞橫笛關山遠  
白草胡沙西塞秋

聽曉角

一作王昌齡

邊霜昨夜墮關榆吹角當城片月孤無限塞鴻飛不度  
秋風吹入小單于

夜上受降城聞笛

回樂峰前沙似雪受降城上月如霜不知何處吹蘆管  
一夜征人盡望鄉



嚴維

維字正文越州山陰人至德二載擢辭藻宏麗科  
辟河南幕府歷諸暨河南尉終秘書郎維與劉長  
卿善相倡和

徐獻忠曰維詩錯綜亦密時出俊語澄除涇渭亦  
可遠致如柳塘春水漫花塢夕陽遲又野燒明山  
郭寒更出縣樓又夜靜溪聲近庭寒月色深皆有  
自然之態神情踈暢自不可少

近體詩

晦日宴遊

晦日湔裾俗春樓致酒時  
山公還已醉謝客舊能詩  
溪柳薰晴淺巖花待閨遲  
為邦久無事比屋自熙熙

九日陪崔郎中北山讌

上客南臺至重陽此會文  
菊芳寒露洗杯翠夕陽曛  
務簡人同醉溪閒鳥自羣  
府中官最小惟有孟參軍

秋夜船行

扁舟時屬暝月上有餘輝  
海燕秋還去漁人夜不歸  
中流何寂寂孤棹也依依  
一點前村火誰家未掩扉

荆溪館呈丘義興

失路荆溪上依人忽暝投  
長橋今夜月陽羨古時州  
野燒明山郭寒更出縣樓  
先生能館我無事五湖遊

同王徵君湘中有懷

八月洞庭秋瀟湘水北流  
還家萬里夢為客五更愁  
不用看書帙偏宜上酒樓  
故人京洛滿何日復同遊

酬劉員外見寄

時劉為睦州司馬

蘇耽佐郡時近出白雲司藥補清羸疾牕吟絕妙詞柳

塘春水漫花塢夕陽遲

歐陽詩話云天容時態融和貽蕩如在目前

欲識懷

君意明朝訪檝師

酬普選二上人期相會見寄

本意宿東林因聽子賤琴遙知大小朗已斷去來心夜  
靜溪聲近庭寒月色深寧知塵外意定後更成吟

送舍弟

疎懶吾成性才華爾自強  
早稱眉最白何事綬仍黃  
時暑嗟於邁家貧念聚糧  
祇應宵夢裏詩興屬池塘

送桃巖成上人歸本寺

長老歸緣起桃花憶舊巖  
清晨雲抱石深夜月籠杉  
道具門人捧齋糧谷鳥銜  
餘生願依止文字欲三緘

贈別劉長卿時赴河南嚴中丞幕府

早見登郎署同時即下僚  
幾年江路永今去國門遙  
文變騷人體官移漢帝朝  
望山吟度日接枕話通宵  
萬里

趨公府孤帆限信潮匡時知己老聖代恥逃堯

九日登高

詩家九日憐芳菊  
遲客高齋瞰浙江  
漢浦浪花搖素壁  
西陵樹色入秋牕  
木奴向熟懸金實  
桑落新開瀉玉缸  
四子醉時爭講德  
笑論黃霸屈為邦

送崔峒使往睦州兼寄薛司戶

如今相府用英髦  
獨往南州肯告勞  
冰水近開漁浦出  
雪雲初卷定山高  
木奴花映桐廬縣  
青雀舟隨白鷺濤

使者應須訪廉吏府中唯有范功曹

歲初喜皇甫侍御至

湖上新正逢故人情深應不笑家貧明朝別後門還掩  
修竹千竿一老身

重送新安劉員外

秋江渺渺水空波越客孤舟欲榜歌手折衰楊悲老大  
故人零落已無多

裴度

度字中立河東聞喜人貞元初擢進士元和末為  
宰相歷事四朝以全德始終與郭汾陽齊名其出  
討淮西過女儿山下刻石題詩後果尅期平賊其  
詩云待平賊壘報天子莫指仙山示武夫由是淮  
蔡底平民安生業

唐趙璘云晉公貞元中作鑄劍戟為農器賦觀其  
氣槩已有立殊勲致太平之意進士李為作淚及  
輕薄暗小四賦李賀作樂府多屬意花草蜂蝶之



間二子終不遠大文字之作可以定相命優劣矣  
近體詩

中書即事

有意効承平無功答聖明  
灰心緣忍事霜鬢為論兵  
道直身還在恩深命轉輕  
鹽梅非擬議葵藿是平生  
白日長懸照蒼蠅漫發聲  
嵩陽舊田地終使謝歸耕

傍水閒行

閒餘何處覺身輕  
暫脫朝衣傍水行  
鷗鳥亦知人意靜

故來相近不相驚

于良史

良史為張徐州建封從事每自吟曰出身三十年  
髮白衣猶碧日暮倚朱門從朱污袍赤建封因為  
奏章服馬官至侍御

高仲武云良史詩清雅工於形似如風蕪殘雪起  
河帶斷水流吟之未終皎然在目

近體詩

春山夜月

春來多勝事，賞玩夜忘歸。  
掬水月在手，弄花香滿衣。  
興來無遠近，欲去惜芳菲。  
南望鐘鳴處，樓臺深翠微。

冬日寄李贊府

地際朝陽滿，天邊宿霧收。  
風兼殘雪起，河帶斷水流。  
北闕馳心極，南圖尚旅遊。  
登臨思不已，何處得銷憂。

閒居寄薛據

隱几讀黃老，閒齋耳目清。  
僻居人事少，多病道心生。  
雨

洗山林濕鴉鳴池館晴晚來因廢卷行樂至西城

李宣遠

宣遠貞元進士登第

近體詩

并州路作

秋日并州路黃榆落照間孤城吹角罷數騎射鵬還帳  
幕遙臨水牛羊自下山征人正垂淚烽火起雲間

宋濟

濟德宗時不第後禮部上甲乙名

近體詩

東隣美女歌

花暖江城斜日陰鶯啼繡戶曉雲深  
春風不道珠簾隔  
傳得歌聲與客心

和王七度玉門關上吹笛

羌人吹笛戍樓間樓上蕭條海月閒  
借問梅花何處落  
風吹一夜滿關山

何扶

扶太和九年及第明年捷三第

近體詩

送閬州妓人歸老

竹翠嬋娟草徑幽佳人歸老傍汀洲  
玉蟾露冷梁塵暗金鳳花開雲鬢秋  
十畝稻香新綠野一聲歌斷舊青樓  
芭蕉半捲西池雨日暮門前雙白鷗

宋邕

邕唐末五雲溪人范攄云邕初無令譽及嬰瞽疾而詩名始彰或戲其詩云綠楊宜向雨中看所謂無眼作有眼之詩

近體詩

春日

輕花細葉滿林端昨夜春風曉色寒黃鳥不堪愁裏聽  
綠楊宜向雨中看

趙光遠

光遠字里未詳

近體詩

題北里妓人壁

魚鑰獸環斜掩門  
萋萋芳草憶王孫  
醉凭青鎖窺韓壽  
閒擲金梭惱謝鯤  
不夜珠光連玉匣  
辟寒釵影落瑤尊  
欲知腸斷相思處  
役盡江淹別後魂

咏手

粧成皓腕洗凝脂  
背接紅巾掬水時  
薄霧袖中拈玉笋



斜陽屏上撚青絲  
喚人急拍臨前檻  
摘杏高揜近曲池  
好是琵琶絃畔見  
細圓無節玉參差

撚玉磋瓊軟復圓  
綠牕誰見上琴絃  
慢籠彩筆閒書字  
斜指瑤堦笑打錢  
指甲試香添麝炷  
舌頭輕點貼金鈿  
象床珍簟宮棋處  
拈定文楸占角邊

鮑防

防字子慎襄州人  
天寶進士遷太原尹  
河東節度使  
德宗授工部尚書  
防尤工詩與謝良弼友善時

號鮑謝

古體詩

雜感

漢家海內承平久萬國戎王皆稽首天馬嘗銜首管花  
胡人歲獻蒲桃酒五月荔枝初破顏朝辭象郡夕函關  
雁飛不度桂陽嶺馬走先過林邑山甘泉御果垂仙閣  
日暮無風香自落遠物皆重近皆輕雞雖有德不如鶴

劉商

商字子夏彭城人居長安工畫山水官至檢校禮部郎中

古體詩

銅雀妓

魏主矜蛾眉美人美於玉高樓無晝夜歌舞竟未足  
盛色如轉圜夕陽落深谷仍令身歿後尚縱平生慾紅粉  
橫淚痕調絃向空屋舉頭君不在惟見西陵木玉輦豈  
再來嬌鬟為誰綠那堪秋風裏更舞陽春曲曲罷情不

勝闌干向西哭臺邊生野草來去胷羅穀况復陵寢間  
雙雙見麋鹿

秋夜聽嚴紳巴童唱竹枝歌

巴人遠從荆江客回首荆山楚雲隔思歸夜唱竹枝歌  
庭槐葉落秋風多曲中歷歷叙鄉思鄉思綿綿楚詞古  
身騎吳牛不畏虎手提蓑笠欺風雨猿啼日暮江岸邊  
綠林連山水連天來時十三今十五一成新衣已再補  
鴻雁南飛報隣伍在家歡樂辭家苦天晴露白鐘漏遲

淚痕滿面看竹枝曲終寒竹風裊裊西方日落東方曉  
柳條歌送客

露井天桃春未到遲日猶寒柳開早高枝低枝飛鸝黃  
千條萬條覆宮牆幾回離別折欲盡一夜東風吹又長  
毵毵拂人行不進依依送君無遠近青青去住隨柳條  
却寄來人以為信

雜言同豆盧郎中郭南七里橋哀悼姚倉曹

橋邊足離別終日為悲辛登橋因歎逝却羨別離人橋

下東流水芳樹櫻桃蕊流水與潮回花落明年開可憐  
三語椽長作九泉灰宿昔懽遊在何處花前飲足求仙  
去

令狐楚

楚字慤士德茶之裔與李逢吉善元和末為相敬  
宗逐李紳楚自宣武節度徙天平入為左僕射子  
綯自湖州召入翰林為學士間歲拜相渭南尉趙  
嘏獻詩曰鷄在卿雲冰在壺代天才業奉訏謨榮

同伊陟傳朱戶秀比王商人畫圖昨夜星辰回劍  
履前年風月滿江湖不知機務時多暇猶許詩家  
屬和無

近體詩

立春後言懷招汴州李庭衙推

閒齋夜擊唾壺歌試望夷門奈遠何每聽塞笳離夢斷  
時窺清鑑旅愁多稍驚宵漏丁丁促已覺春風習習和  
海內故人君最老花間鞭馬更相過

遊晉祠上李逢吉相公

不歷晉祠三十年白頭重到一凄然  
泉聲自昔鏘寒玉  
草色雖秋耀翠鈿  
少壯同遊寧有數  
尊榮再會便無緣  
相思臨水下雙淚  
寄入并汾向洛川

遠別離

玳織鴛鴦履金裝翡翠簪  
畏人相問著不擬到城南

遊春辭

一夜好風吹新花一萬枝  
風前調玉管花下簇金羈



長相思

君行登隴上妾夢在閨中  
玉筋千行落銀牀一半空  
綺席春眠覺紗窓曉望迷  
朦朧殘夢裏猶自在遼西

從軍行

荒雞隔水啼汗馬向風嘶  
終日隨旌旆何時罷鼓鼙  
却望冰河濶前登雪嶺高  
征人幾多在又擬戰臨洮  
胡風千里驚漢月五更明  
縱有還家夢猶聞出塞聲  
暮雪迷青海陰崖覆白山  
可憐班定遠生入玉門關

思君恩

小苑鶯歌歇長門蝶舞多  
眼看春又去翠輦不經過  
紫禁香如霧青天月似霜  
雲韶何處奏祇是在昭陽

少年行

少小邊城慣放狂  
驍騎蕃馬射黃羊  
如今年老無筋力  
猶倚營門數雁行

弓背霞明劍照霜  
秋風走馬出咸陽  
未收天子河湟地  
不擬回頭望故鄉

望春辭

高樓望見一花開  
便覺春光四面來  
暖日晴雲知次第  
東風不用更相催

長孫佐輔

佐輔朔方人德宗時弟公輔為吉州刺史佐輔往  
依焉

古體詩

山居雨霽即事

結茅蒼嶺下自與喧卑隔况值雷雨晴郊原轉岑寂出  
門看反照繞屋殘漏滴古路絕人行荒陂響螻蝻籬崩  
瓜豆蔓圃壞牛羊跡斷續古祠鴉高低遠村笛喜聞東  
臯潤欲往未通屐杖策試危橋攀蘿瞰苔壁隣翁夜相  
訪緩酌聊跂石新月出汗躄浮雲在中鳥常墮腐儒操  
謬習經邦畫有待時未知非關慕沮溺

關山月

淒淒還切切戍客多離別何處最傷心關山見秋月關

月竟如何由來遠近歌始經玄菟塞終繞白狼河  
忽憶秦樓婦流光應共有已得並蛾眉還知攬  
織手去歲照同行比翼復連形今宵照獨立  
顧影自矻矻餘輝漸西落夜夜看如昨借問  
映旌旗何如鑒帷幙拂曉朔風悲蓬驚雁不  
飛幾時征戍罷還向月中歸

隴西行

陰雲凝朔氣隴上正飛雪四月草不生北風勁如割  
朝來羽書急夜宿長城窟道隘行不前相呼抱鞍歇  
人寒

指欲墮馬凍蹄亦裂射雁旋充饑斧冰還止渴寧辭解  
圍鬪但恐乘疲沒早晚邊候空歸來養羸骨

山行即事

日落風颺颺驅車行遠郊中心有所悲古墓穿黃茅茅  
中狐兔窠四面烏鳶巢鬼火時獨出人烟不相交行行  
近破村一徑欹還坳迎霜聽蟋蟀向月看螭蛸翁喜客  
來坐客來羞厨庖濁醪誇潑螳時果仍新苞相勸對寒  
燈呼兒爇枯梢性樸頗近古其言無斗筭憂歡世上并

歲月途中拋誰知問津客空作揚雄嘲

古宮怨

窓前好樹名玫瑰去年花落今年開無情春色尚識返  
君心忽斷何時來憶昔粧成候仙仗宮鎖玲瓏日新上  
拊心却笑西子嚔掩鼻誰憂鄭姬謗草染文章衣下履  
花粘甲乙床前帳三千玉貌休自誇十二金釵獨相向  
盛衰傾奪欲何如嬌愛翻悲逐佞諛重遠豈能慙沼鵠  
棄前方見泣舩魚看籠不記薰龍腦詠扇空曾禿鼠鬚

始喜類蘿新託栢終傷如薺却甘茶院深獨開還獨閉  
鸚鵡驚飛苔覆地滿箱舊賜前日衣漬枕新垂夜來淚  
恨多開鏡照還悲綠髻青蛾尚未衰莫道新繡長絕比  
猶逢故劍會相追

尋山家

獨訪山家歇還涉茅屋斜連隔松葉主人聞語未開門  
繞籬野菜飛黃蝶

對鏡吟



憶昔逢君新納聘青銅鑄出千年鏡意憐光彩固無瑕  
義比恩情永相映每將鑿面兼鑿心鑿來不輟情逾深  
君非結心空結帶結處尚新恩已背開簾覽鏡悲難語  
對面相看孟門阻掩匣徒慙雙鳳飛懸臺欲効孤鸞舞  
粧成持照尚當時只畏愁多遽變衰昔日照來人共許  
今朝照罷自生疑鏡上有塵猶可拂君恩詎肯無迴時  
南中客舍對雨送故人歸北

猿聲啾啾雁聲苦卷簾相對愁不語幾年客吳君在楚

况送君歸我猶阻家書作得不忍封北風吹斷塔前雨  
近體詩

代別後夢別

別中還夢別悲後更生悲覺夢俱千里追尋難再期  
翻思夢裏苦却恨覺來遲縱是非真事何妨夢會時

杭州秋日留別故友

相見又相別大江秋水深悲歡一世事去住兩鄉心  
浙灘籬下葉淒清塔上琴獨隨孤棹去何處更同衾

別友人

愁多不忍醒時別  
想極還尋靜處行  
誰遣同衾又分手  
不如行路本無情

御定全唐詩錄卷四十五